

Hosáya

¹ Ọwaa okfu, Ojejoje kfuru Hosáya Beri. Teke o kfuru iya ẹya bụ teke Uzáya; Jótamu; Éhazu; Hezekáya bụtsua eze; chĩa ndu Júda; mękwaphu teke Jeróbuwamu Jehowashi bụ eze; chĩa ndu Ízurelu.

Nyee Hosáya yele unwu iya

² Teke Ojejoje wataru ogude Hosáya ekfu okfu b'ọ sụru iya: “Tụgbua je alụa nwanyi ọkpara; nggu amụshia unwegirima, bụ ndu ọdo yeshiru ime ẹphe; kele ndu alị-a agbakọta ọkpara; shiwa ẹge ono lufu mu l'ẹka.”

³ Ya ndono; yọ tụgbua je alụa nwanyi, eeku Goma, bụ nwatibe Dibilemu. Yọ bya atsuta ime; mụaru iya nwata nwoke.

⁴ Ojejoje asụ Hosáya: “Iphe ịi-gụ iya bụ Jézerilu; ke l'ẹ ta anọdu ọphu baru ishi; ya agwata ọnu-ulo Jéhu ugwo ọchi ndu ẹphe gbushiru le nsuda Jézerilu. Ya e-chikpokwaphu alị-eze ndu Ízurelu. ⁵ Mbọku ono; be ya a-nọdu le nsuda Jézerilu gbajishia akfu ndu Ízurelu.”

⁶ Tọ dọ iya bụ; Goma abya atsuta ime ọdo; mụa nwanyi. Ojejoje asụ Hosáya: “Gua ya Loruhama. Ishi iya aburu le mu ta aphuheduru ndu Ízurelu obu-imiko; mu ta agụheru ẹphe nvu ọdo. ⁷ Ndu mu a-phuru imiko bụ ndu ọnu-ulo Júda. Mu te egudedu akfu; mu te egude ogu-mbeke adzọ ẹphe. Mu te egudekwa ọgu-igba;

mu te egude ìnya-ògu; m'ò kwanu ndu agba iya nù dzòo èphe. Onye e-me iya nù kwa Nnajiufu, bụ Nchileke.”

⁸ Ya ndono; yo heghelephu Loruhama; mbụ Goma; bya atsuta ime; mụa nwata nwoke ọdo.

⁹ Ojejoje asụ Hosáya: “Iphe ìi-gụ iya bụ Lowami; kẹ l'unu ta bụhedu ndibe iya; ya ta bụhe Nchileke unu.”

Ndu Ízurelu alaphu azụ l'ọnodu èphe

¹⁰ “Obenu l'e -metsua; bẹ ndu Ízurelu a-dukwa igwe l'ọ bụ eveve mgbogidi eze ẹnyimu, ẹ ta amaghedu ẹge ẹra iya beru; ọphu a gụtađu iya agụta. Ọ kwa l'ẹke, a nọdu; sụ èphe: ‘L'èphe ta bụdu ndibe iya’; bẹ aa-nọdukwapu kua èphe ‘unwu Nchileke, nọ ndzụ.’ ¹¹ Aa-bya emee tẹ ndu Júda èphe lẹ ndu Ízurelu tųgbabe bụru nanụ ọdo; èphe afọta onye lanụ, a-bụru ishi èphe; èphe eshi l'alị ono lakọta; kẹle mbọku Jézerilu ono a-đu biribiri.

2

¹ “Unu kua unwunne unu ndu k'unwoke ‘ndibe mụbe Ojejoje.’ Unu ekua unwunne unu ndu k'unwanyị ‘ndu, mu yeru obu.’

Ízurelu eri ogori l'ọbu Goma

² “Baaru nne ngu mba; baaru iya mba; kẹ l'ẹ tọ bụhedu nyee ya; ọphu ya abụhedu nji iya. T'ọ haa umere nwanyị ọkpara ono, nọ iya l'ifu ono; yọ hakwaaphu umere ogori ono, jiru iya nggudunggu ejiji ono! ³ Ọdumeka; bẹ ya e-mekwa iya t'ọ gbaru ọtu; ẹge ọ gba iya mbọku, a mụru iya. Ya emee ya; yọ daburu swanmangu

l'ò bú echi-ègu alì òkponku; kpò-gbua ya l'ègu mini. ⁴ Ya ta abyadù bya aphùru ùnwegirima iya imiko; kẹ l'èphe bú ùnwegirima, a gbataru l'òkpara. ⁵ Nne èphe gbaru òkpara; k'òphu bú l'ège o gude tsùta ime èphe; bẹ iphere iya dù. Ọ sùru lẹ ya a-gbatsoru ndu èphe l'iya awùko ènyishi mini, bú ndu bú èphe anù iya nri; anù iya mini; anù iya èji-atùru; anù iya èkwa-òcha; anù iya manù yẹle mẹ, ya aanguje.

⁶ “Mbù; yẹbe Ojejoje e-woru ògarama-mbo tò-chishiaru iya ùzo. Ya e-gude ùpho-mkpuma kpù-pheta iya mgburumgburu ège è-tò phùdu ùzo, oo-shi. ⁷ Ọo-nòdu agba agbakfu ndu ono yẹle iya awùko ènyishi mini ono; òbu l'è tò dùhedu ike ebyipyabẹ èphe. Ọo-chò èphe; tò phù èphe. Ọ bú teke ono; bẹ ọo-sù tẹ ya bya alaphu azù lẹ kẹ nji iya; kẹle teke ono shi kakwaru iya lẹ mma malẹ nta-a.

⁸ “È to gbe madu l'ò bú yẹbe Ojejoje meru yo nweru ereshi; mẹ mẹ; ọwaa manù olivu; bukwaruphu yẹbedua veru iya mkpòla-òcha; mẹ mkpòla-ododo ono, o gudèphu l'agwa Bálu ono. ⁹ Ọ ya kparu iphe ya a-nata iya witu iya teke ọ charu; nata iya mẹ ọphungu iya teke ọ búwa ikpe-onyingu; naphuta iya èji-atùru iya azù; nata iya èkwa-òcha iya, ya chẹru iya t'è b'ò gba ọtu. ¹⁰ Nta-a; bẹ ya agbabe iya ọtu l'ifu ndu yẹle iya awùko ènyishi mini; tò dù onye adù ike nafù mu iya l'èka. ¹¹ Iphe bú eswe-iphe ọogbaje; bẹ ya e-buchikota; mbù iphe bú aji, ọogbakotaje afa l'afa; mẹkpo Aji Ọnwa Ọphungu, ọogbaje; mẹ aji mbòku ọtu-ume, ọogbaje; mbù iphe bukpo

eswe-iphe ono, ọogbakotaje ono, gekotaru egeru ono. ¹² Mu e-mebyishi vayinu iya; mebyishia oshi figu iya, bu iphe ono, ọ sọru lẹ ndu ẹphe l'iya awuko ẹnyishi mini nuru iya ono. Ya e-me ẹgu ono t'ọ buru urukuma ẹgbudu; ọo-bu anẹgu-ẹgbudu, bu l'ẹgbudu e-ri iphe ono, a kọru iya ono. ¹³ Iphe bu mbọku ono, ọ kporu Bálu ínsensu ọku ono; bẹ ya a-hùkota iya àhùhù iya. Je akpaa lẹ mbọku, o gude iphe-nchị; mẹ mgbubu kwaa onwiya ngwa kfu-tsoru ndu ẹphe l'iya awuka ẹnyishi mini; zahaa yẹbe Ojejoje." Ono iphe Ojejoje ekfu ndono.

*N-yemobu Ojejoje
l'ẹke ndibe iya nọ*

¹⁴ "Mbụ lẹ nta-a; bẹ ya abyawa iya edeta defu; ya e-deru iya deba l'echi-ẹgu je erobe ẹhu erobe kfuaru iya okfu. ¹⁵ Ọ bu ẹke ono; bẹ ya a-nu-phu iya mgbo vayinu iya azu. Ya emee tẹ nsuda Akọru buru ẹke obu a-nọ iya. Ọ bu l'ẹke ono; bẹ ọo-nọdu kweta nke mu ẹge o shi kweta iya teke ọ bu nwamgbọko; mbụ ẹge ono, o meru mbọku ono, o shi Íjiputu lufuta ono.

¹⁶ "O -rua mbọku ono; bẹ ii-ku yẹbe Ojejoje nji ngu. Ẹ tii kuhedu iya Bálu ngu. ¹⁷ Ya e-me t'ẹpha Bálu be eshihe ngu l'onu lufuta ọdo; ọphu iikpovuhedu iya l'enwa ọdo.

¹⁸ "O -rua mbọku ono; bẹ ya a-gbaru ẹphe ndzụ; ẹphe l'anẹgu-ẹgbudu; unwenu, ẹphe l'eli; mẹ anu, akpu l'ẹpho. Ya e-wofuru ẹphe ọgu; wofu akfu; wofu ogu-mbeke l'alị ono; k'ọphu obu e-ru ẹphe ali; ẹphe ta atsuhe egvu teke ẹphe laru l'ulo.

- 19 “Ya a-lụ ngu jeye ị gbururu jeye.
 Ya e-gude odobe-ẹka-ndoo;
 mẹ ikpe, dụ maa ịa ngu.
 Ya egude n-yemobu;
 mẹ obu-imiko ịa ngu.
- 20 Ya e-gude ire-lanụ l'alụ ngu;
 nggu eshiwa iya rụ maru mubẹ Ojejoje.”
- 21 Ojejoje sụru:
 “Lẹ mbọku ono;
 bẹ ya a-za akpamigwe oku;
 akpamigwe aza mgboko oku nk'ia.
- 22 Mgboko azakwanu iphe,
 e meberu l'alị oku;
 za iya mẹe ọphungu;
 za iya manụ.
 Ẹphebedua azakwanu iya ndu Jézerilu.
- 23 Ya e-me t'ẹphe nguru
 anguru l'alị ono;
 bụru ndibe iya.
 Ndu ono, ya shi sụ
 ị ya ta 'aphụduru imiko ono;
 bẹ ya a-phụru imiko.
 Ndu ono, ya shi sụ
 l'ẹphe ta bụdu ndibe iya ono;
 bẹ ya a-sụ l'ẹphe bụ ndibe iya.
 Ẹphebedua a-sụkwanu
 ị ya bụwa Nchileke ẹphe.”

3

Hosáya yele nyee ya ekpeshi

- ¹ Tọ dụ iya bụ; Ojejoje asụ mu: “Tẹ mu je emee tẹ nyee mu maru ị mu yewaru iya obu

odo. E gudekwaru l'onye odo yeru iya obu; yoo ri ogori. Obenu tẹ mu yeru iya ru obu ẹge ono, Ojejoje yeru ndu Ízurelu obu; t'ọ kpa ishi l'ẹphe ghachiwaru ifu l'ogwa-phe nte; kpọwaru obu ye lẹ nri, a gwaru nte.”

² Ya ndono; ya atugbunua je azuta iya. Iphe ya zuru iya bu mkpola-ocha iri l'ise; owaa ẹkpa balị l'ugvu iya. ³ Tọ du iya bu; ya abya asu iya: “T'ọ nopyabekwa lẹ nk'iya ujiku olemole. Ba agbakwa okpara; ophu o dukwa onye nggu l'iya e-shi onya; o kwaphu ẹge ono; be yebedua a-noduru ngu.” ⁴ Kele ndu Ízurelu a-no; ẹphe te enwe eze; ẹphe te nwe ndu ishi; ẹphe ta agwa iphe; ophu ẹphe enwedu mkpuma, du nso; ẹphe te enwe uwe-ukuvu; ẹphe te je l'ogvu.

⁵ E -megee; be ndu Ízurelu a-lata azu bya ocho Ojejoje, bu Nchileke ẹphe; me eze ẹphe ono; mbu Dévidi. L'ikperazu; be ẹhu a-nodu anma ẹphe ketekete t'ẹphe lakfuta Ojejoje; bya anata onu-oma, shi iya l'eka.

4

Ikpe, a nmaru ndu Ízurelu

¹ “Unu ngabekwa nchi; nua iphe Ojejoje ekfuru unube ndu Ízurelu; kele Ojejoje; be okfu noru yele ndu ali-a. E to dudu onye e gude ire iya aka l'ali-a; to nwe onye yeru ibe iya obu; ophu o dudu onye maru Nchileke l'ali-a. ² Iphe no iya nu nwenkinyi bu mburonu; ejo-ire; ogbu ochi; iphura; me l'ori ogori. Ejo iphe tuko ekemeke naru. E -gude ekfu l'e gburu onye owaa; e gbua onye odo. ³ Yo buru iya meru iphe ali-wa agu

aphu. Iphe bu ndu bu iya nu anwu kparakpara. Anegu-egbudu; unwenu, ephe l'eli; me ema, bu l'enyimu tuko anwushihu.”

Ikpe, a nmaru ndu achijeru Nchileke eja

⁴ Olobu; t'e b'o dukwa onye okfu a-duru yele ibe iya; ophu o dukwa onye e-bo ibe iya ibo; ke l'o bu unube ndu achijeru Nchileke eja; be okfu noru unu l'iya. ⁵ Eswe l'enyashi; be ukfu anodu akpo unu. O kwaphu ege ono; be oo-nodu akpo ndu nkfuchiru Nchileke. Oo ya bu le ya ewofu nne unu, bu iya bu Izurelu. ⁶ Ndibe iya ala l'iyi; okfu le mmamiphe pehuru ephe. Keshinu unu jikaru mmamiphe; be ya jikakwaruphu unu t'unu ba abuhe ndu achijeru iya eja.

Keshinu e to nwe
 iphe unu guberu ekemu
 Nchileke unu;
 b'e to nwekwa iphe
 ya agube unwegirima unu.

⁷ O bu ege ndu achijeru Nchileke eja aka l'igwe l'eje; bu ege ephe aka ome ejo iphe l'eje. Ya ewota ugwu, gbaru ephe docha edocha; wota iphe iphere doberu ephe. ⁸ Ephe gude ejo iphe ndibe mu eme l'aba. Ejo iphe anoduje anma ephe ehu. ⁹ Oo ya bu l'ege oo-du bu l'oo ege e meru madzu mmanu odo; bu ege ee-me ndu achijeru iya eja. Ya a-jiko ephe labu na aphu iphe ephe eme; mbu; kfu ephe ugwo iphe ephe meru. ¹⁰ Ephe e-rije nri ria ria; to ji ephe ephe. Ephe agbaa okpara gbaa gbaa gbaa; ephe ta akadu nshinu; ke l'ephe ta anuheduru Ojeje okfu.

11 “Ọgba ọkpara; mẹ ọngu akahụ mée yẹle mée ọphungu bukota iphe nafuwaru ndibe iya egomunggo. 12 Ndibe yẹbe Ojejoje wataru oje oshi, a pyiru apyipyi njita. Yọ buru nwantekpe, a pyiru l'oshi wataru ephe okfuru iphe ephe eme. Iphe dusweru ephe aburu ọkpara, ephe wataru agbagba. Ephe abya aburu ndu emeru Nchileke gheleghele. 13 Ephe abya awata ọgwa iphe l'ọnungonu ugvu; wata ọkpo aja ọku lẹ mgbogidi mgbogidi; ukfu achị ukfu ukfu achị; ukfu oshi popula; metsuwaru l'ukfu oshi terébinti, butsua oshi, agu iya eguje egugu.

“Ọ bụ iya kparu iphe unwanyi unu yeru ẹka l'ọgba ọkpara; ndu ọphu unu alụ alulu awata ori ogori. 14 Ya ta ahụkwa unwu unu ahụhụ teke ephe wataru ọgba ọkpara. Ọphu ya 'ahụkwa ndu ọphu unu alụ alulu ahụhụ teke ephe wataru ori ogori; ke l'unwoke ephe etso unwanyi ọkpara; tsoru unwanyi ọlo-agwa l'agwa iphe. 'Obenu lẹ ndu ẹ te nwedu egomunggo e-mekocha-a laa l'iyi.'

15 “Keshinu unu agba ọkpara; unube ndu Ízurelu; tẹ ndu Júda; be tsobukwaru unu! Unu be ejekwa Gíligalu; ọphu unu 'ejekwa Bétu-Avenu je ọgwa iphe! Ọphu unu 'agụkwa ẹnwa; sụ: 'Kamenu!' 16 Ndu Ízurelu eshi ọnwu l'ọ bụ nwada-eswi, kweru ikpokponyi. ? Nanụ ẹge Ojejoje e-shi eche ephe ẹge eecheje aturu l'ẹke ephe akpa nri? 17 Ífuremu; be yẹle nte kụwaru onwephe mgba akuku. Ọo ya bụ t'a haa yẹbedua. 18 Ọobuje; mée ephe gvụ; yọ loru ephe ye l'ọgba ọkpara. Iphe aduje ndu ishi ephe

mma bu ome iphe-iphere iya du. ¹⁹ Obenu l'òbu oke phèphere e-mekochaa paa èphe gelengu. Iphere nte ono, èphe agwa ono e-mekocha-a du èphe.”

5

¹ “Unu nùkwaphu iphe-a; unubè ndu achijeru yèbe Ojejoje èja! Unu ngabèkwa nchi; unubè ndu Ízurelu! Unu ngabèkpoduduphu nchi; unubè ndibe eze! Ikpe-wa nmakwaru unu; kè l'unu shi buru ònyà, gbachiru ụzo lè Mízupa; buru ụgbu, e geru l'ugvu Tábo. ² Ndu ono, kwefuru íkè ono bamiakwaru abami l'ogbu òchi. Òle ya a-nùkwanu èphe aphụ l'ège èphe ha. ³ Ndu Ífuremu; bè ya makọtaru ège èphe du. Òphu ò dudu ndu Ízurelu anòdu l'edomi. Unubè ndu Ífuremu; nta-a; bè unu watawaru ògba òkpara. Ndu Ízurelu; farùshiwaru onwèphe.”

Hosáya anma òkwa k'ògwa nte

⁴ Iphe èphe emeebe te ekwedu èphe t'èphe ghaa ifu lakfuta Nchileke èphe; kè l'ògba òkpara; bè baru èphe nvụ l'èhu; èphe ta maè Ojejoje. ⁵ Ekuku, ndu Ízurelu eku onwèphe; bu iya atụ ònu èphe. Ndu Ífuremu evukotaje èjo iphe, èphe eme l'onwèphe l'adashì. Ò kwaphu ège ono; bè ndu Júda tso èphe l'adashì. ⁶ Èphe e-ruta aturu èphe mè eswi èphe jeshia ole ènya Ojejoje; òbule èphe ta aphudu iya; kè l'ò ghawaru èphe azụ. ⁷ Èphe te kwedu tẹ Ojejoje gude ire èphe èka. Èphe mụshiru iya ụnwu, ta budu èphe yeru ime èphe. Nta-a; bè Aji

Ọnwa Ọphungu e-ripya ẹphe; ripyaa iphe ẹphe meberu l'okfu ẹphe.

*Ọgu ndu Júda;
ẹphe lẹ ndu Ízurelu*

⁸ “Unu je egbua ọpyoku lẹ Gíbiya! Unu egbua opu lẹ Ráma! Unu eje echia mkpegbe-ọgu lẹ Bétu-Avenu! Unubẹ ndu Bénjaminu; unu wu-lihu nọ jeshia! ⁹ Alì ndu Ífuremu; bẹ ee-me t'ọ daburu ochobo mbọku, aa-nọ ẹphe aphụ. Mbụ l'iphe ya ekfuru ikfu ikfu ndu Ízurelu bụ iphe mefutaje nọ.

¹⁰ “Ndu ishi ndu Júda dụwa l'ọ bu ndu afọshije ẹkpè, e gude kpaa ókè-alì. Ya e-me t'oke ẹhu-eghughu iya nwua dukungu l'ọ bụ utso; kpushi ẹphe. ¹¹ Ndu Ífuremu b'a kpa ẹhu. E gudewa ikpe, nmaru ẹphe nọ tepya ẹphe etepya; kẹ l'ẹphe woru ishi yemia l'ome mkpọkoro iphe.

¹² Ọo ya bụ; ya e-rilephu ndu Ífuremu ẹge ono, nra erije iphe ono; mbụ ya e-me ndu Júda t'ẹphe rehu erehu. ¹³ Tọ dọ iya bụ; yo be teke ndu

Ífuremu phuru iphe-ememe, eme ẹphe; ndu Júda abya aphua ọnya, aba ẹphe; ndu Ífuremu ejeshia Asiriya; oje oku onye eze ono, ha nshinu ono t'ọ bya eyeru ẹphe ẹka. Ọbule ẹ tọ dudu ike mee t'ẹphe kọrohu; tọ dukwaphu ike mee t'ọnya ono, aba ẹphe ono kpọhu. ¹⁴ Ya a-furu

ndu Ífuremu l'ọ bụ agụ. Ẹge ono; bẹ ya a-fukwaruphu ndu Júda l'ọ bụ oke agụ. Ya a-labushi ẹphe viriviri; tugbua. Ya a-gu-li ẹphe tugbua; ọphu ọ dudu onye a-dụ ike dzọfu ẹphe.

¹⁵ Ọo ya bụ teke ono mu alashia azụ lẹ nke

mu je anọdu jeye teke ẹphe e-kweta l'ọ nmaru ẹphe; bya awata ọcho yẹbe Ojejoje. Ẹphe a-nọdu l'iphe-ẹhuka l'achọ iya achọ-shi iya ike.”

6

Izimana te kwedu ọla ndu Ízurelu azu

¹ “Unu bya t'ayi lata azu lakfu Ojejoje. Ọ labushiru ayi v̄iriviri; ọbule oo-me t'ayi kọrohu. O mekawaru ayi iphe; ọbu l'oo-gude-e iphe kechia ayi ọnya iphe o mekatsuaru ayi. ² Abali ẹbo nta-a; bẹ oo-me t'ayi gbakerehu. L'abali k'eto ya; yo mee ayi t'ayi gbeshi; k'ọphu ayi e-buru eburu l'ẹke ọ nọ. ³ Unu t'ayi maru Ojejoje! T'ayi keshia ẹhu maru onye ọ bu. T'ọ buru ẹge ono, ẹnyanwu awafutaje l'utsu ono bu ẹge ọo-byakfutaje ayi. T'ọ buru ẹge ono mini ọdungu emeje t'alì jia oyi ono bu ẹge ọo-byakfuta ayi.”

⁴ “Unubẹ ndu Ífuremu; ?bu ngunu; bẹ ya e-me unu? Unubẹ ndu Júda; ?bu ngunu; bẹ ya e-me unu? N-yemobu nk'unu dukwa l'ọ bu iji nchi-abọhu, ta akpojedu ukfu. Ọ dulephu l'ọ bu iji ngguge-utsu, ephukashihu iya te nwedu iphe ọobuje. ⁵ Ọ bu iya kparu iphe ya gude ndu nkfuchiru iya gbua unu pyaapyaa; bya egude okfu, shi iya l'ọnu nyia unu ikpakfu. Ikpe, ya kperu unu a-nọdu enwu unu vaavaa l'ẹhu l'ọ bu ebemu-igwe; ⁶ kẹ l'iphe du yẹbe Ojejoje mma bu t'unu phujeru madzu imiko; ẹ tọ budu ngweja. Iphe du iya mma bu t'unu maru yẹbe Nchileke; ẹ tọ budu t'e gwojeru iya ngweja-ukfuru.

⁷ “Ọ kwa ẹge Adamu dakaru ndzu, ẹphe l'iya gbaru; bẹ ẹphebedua dakakwaru iya phu. Ẹphe

te kwedu t'e gude ire ephe ẹka l'ẹke ono. ⁸ Gíledu bu alì ndu eme iphe dọ ẹji. Iphe jiru iya nọ bu mee, ndu e gburu egbugbu. ⁹ Ọ bu ẹge-a, ndu abalì-d'egvu anọduje l'egbudu; kwabẹru madzọ-a bu ẹge ndu achijeru Nchileke ẹja nọ. Ẹphe anọduje l'uzo, e shi eje Shékemu l'egbu ọchi; ọphu ọ dudu egbe ẹjo iphe, ẹphe haru m'ọo nanu. ¹⁰ Ya phụakwaru iphe anyị ishi ẹdzu lẹ Ízurelu. Ọ kwa l'ẹke ono; bẹ ndu Ífuremu nọ; wata ọgba ọkpara; buru l'ẹke ono; bẹ ndu Ízurelu nọ; farushia onwẹphe.

¹¹ “A -bya l'ẹhu k'unubẹ ndu Júda; e dobekwaru mbọku, aa-kpa unu l'ọ bu onye akpa nji. Ọ bu teke ono; bẹ ya e-dobephu ndibe iya azu l'ọnodu ephe.”

7

¹ “Ọobuje teke mu eme tẹ ndu Ízurelu kọrohu l'iphe eme ephe; ẹjo iphe ndu Ífuremu eme abya esee ya l'ifu. Ọ kwaphu ẹge ono; bẹ ẹjo iphe kẹ ndu Samériya eseje: mbu tuphu-tuphu-tuphu ndu Samériya ono; iphura, ephe etsufushije ọlo madzọ l'ezi; mẹ ẹge ephe ekeje l'uzo l'ana ndiphe iphe l'ike. ² Obenu l'iphe ephe ta madu bu lẹ ya nyatakọtaru-a ẹjo iphe, ephe mekotaru. Ẹjo iphe ephe meshiru; bẹ ribudowaru ephe; kẹle tekenteke; bẹ ọono iya l'ifu.”

Aachi ẹjo idzu l'ufu-eze

³ “Ẹphe egudeje ẹjo iphe, ephe eme l'eme t'ẹhu tsọ eze ephe ẹna; gude ẹjire l'eduphu unwu eze ọzo. ⁴ Ẹphe l'ephe ha erikota ogori. Ẹgu t'ephe ria ogori anọduje enwu ephe l'ẹhu l'ọ

bụ ọku ite-igwe buredi; mbụ ọku onye eghe iya nù ta adunwudu adunwu jeye yo gwọọ buredi gwọ-ghee; mbụ jeye e ghee buredi ọphu; yo kolishikota. ⁵ L'eswe mbọku onye eze ayi gbaru aji; bẹ ndu ishi nguru mēe; jeye ẹnya achaa ẹphe too. Eze yele ndu mgbonu abya agbaa ẹka. ⁶ Obu enwuje ẹphe ọku l'ọ bụ ọku ụzu l'ẹke ẹphe achije ẹjo idzu gude jekfu iya. Obu enwukotaje ẹphe ọku l'enyashi phuu; o be l'ụtsu; yọ gbanwuhu nwulaha l'ọ bụ ire ọku.

⁷ “Epehe l'ephe ha; bẹ obu enwu ọku l'ọ bụ ọku ụzu. Ndu ishi ẹphe l'ephe ha; bẹ ẹphe egbushije. Ndu eze ẹphe l'ephe ha nwushihuwaru; tọ dọ ẹphe onye rakuru iya nù.”

Ízurelu; ẹphe lẹ mbakeshi

⁸ “Ífuremu; bẹ ẹphe lẹ mbakeshi ghawaru ẹghirigha. Ífuremu; bẹ dọwa l'ọ bụ akara, gheru ibe lanụ ibe lanụ. ⁹ Ndu ọhodo anachaje iya ike; ọphu ọ madu l'ẹge eme iya ndono. Egbushi ekewa iya ẹwonyi-ẹwonyi; ọphu ọ madu l'ọ bụ ẹge ono b'ọ dọ iya. ¹⁰ Ekuku ono, ndu Ízurelu eku onwẹphe ono agba ama ẹge ẹphe dọ. Ọphu ọ kpajekpoduanu ishi t'ọ lakfuta Ojejoje, bụ Nchileke iya; ẹphe ta akpa ishi t'ẹphe maru iya. ¹¹ Ífuremu dulephu l'ọ bụ ndo. Eduswe iya te nwedu iphe ọobuje; to nwe egomunggo; ọ -gbakfu Íjiputu; yọ gbakfu Asiriya. ¹² Ẹphe gbeshide atugbu; bẹ mu a-chịta ugbu mu ghaa; lọ-tsuta ẹphe l'ọ bụ ụnwenu, epehe ephephe. Mu a-hù ẹphe àhùhù k'ẹjo iphe ono, ẹphe mekotaru ono.

¹³ “Nshoọ ẹphe; kẹ l'ẹphe gbafuluwaru mu l'ẹhu; kpurupyata a-buru nk'ẹphe; kẹ l'ẹphe kwefuru mu íkè. O dujekpo mu tẹ mu dzoo ẹphe; obu l'ẹphe adzujeru mu ẹjo-ire. ¹⁴ Ẹphe te egudejedu obu ẹphe araku iya. O chia l'iphe-azee ẹphe; be ẹphe anoje l'akwa ẹkwa witu; me ẹkwa mee vayinu ophungu; l'egbubashi onwẹphe onya l'ẹhu. Obekwanu l'ẹphe gharu iya azu. ¹⁵ O bu yẹbedua zuru ẹphe; mee ẹphe; ẹphe enweru agburu-ẹhu; obule ẹphe gbe anoduje achiru iya ẹjo idzu. ¹⁶ Ẹphe te kwedu byakfuta yẹbe Okaribe-Kakota-Nu; ẹphe du l'o bu akfu nweru ẹkworo. Ndu achị ẹphe bu ogu-mbeke; be ee-gude gbushia ẹphe; kẹ l'ẹphe ekfujeru mu okfu, ta dudu mma; ee-gude k'iphe-a mee ẹphe iphe-ozichị l'alì Íjiputu.”

8

Ndu Ízurelu agwa nte

¹ “Unu yekwa upyoku l'onu; kẹ l'udele bekwaru l'eli ulo Ojejoje; yo buru iphe kparu iya nu bu le ndu Ízurelu mebyiwaru ogba-ndzu mu l'ẹphe; bya ekwefu íkè l'ẹphe te emedu ekemu mube Ojejoje. ² Ndu Ízurelu echiku iya le mkpu; su: 'Nggube Nchileke ayi; ayi maakwaru ngu-a!' ³ Obenu le ndu Ízurelu jikawaru iphe du mma. Yo buru onye ohogu e-mekochaa chia ya oso.

⁴ “Ẹphe afotaje ndu a-buru ẹphe eze; ẹphe ta achị-koshi mu idzu iya. Ẹphe afota ndu a-buru ẹphe ishi; ẹphe te eme tẹ mu maru. Ẹphe egudeje mkpola-ocha; me mkpola-ododo akpushiru onwẹphe nte; shi ẹge ono emetaru

onwèphe ọ-la-l'iyi. ⁵ Unu tufakwaa nte nweswi unu ono; unubè ndu Samériya; kẹ l'o ghuakwa iya eghughu l'ènya! ?Bù teke ole; bè ndu Ízurelu a-nọ-bebe; tẹmanu èphe adu ike du-gee mma l'ifu iya? ⁶ Ọ bù lẹ Ízurelu b'o shi; mbù nweswi ọbu, bù iphe ndu eme nka meru. Ẹ tọ bùdu Nchileke b'ọ bù. Ọ bù iphe aa-kùkposhi ibiribe ibiribe; mbù nweswi ndu Samériya ono. ⁷ Èphe akoje phèphè l'ọ bù okfu. Èphe -kpatadè iya akpata; èphe akpata iya ọku-maa. Akpe ẹ-ta patadu okpoko; ta mìtakwa nebyi. Ọ -mìtakpoonu nebyi amita; bükwa ndu ọhodo e-ri iya. ⁸ Ndu Ízurelu b'e lemiwaru. Nta-a; bè èphe nọtsuwa l'iphe bù mbakeshi l'ọ bù iphe ta dudu mkpa, ọoga; ⁹ kẹ l'èphe tųgburu jeshia Asiriya l'ọ bù nkakfù-ìgara-ọswa, aghaphe nkinyi iya. Ndu Ífuremu; bè butawaru ndu èphe l'èphe a-nọdu eshi ọnya ebuta, ¹⁰ A makwaru-a l'èphe je ebukoo ndu ọnya l'iphe bù mbakeshi; ọbu lẹ ya byalẹrua bya achikobe èphe ọdo; tẹ ọkaribe onye eze ono kpua èphe ishi.

¹¹ “A makwaru-a lẹ ndu Ífuremu kpùshiru ẹnya-ngwẹja, ha igweligwe, èphe a-nọduje egwo ẹja l'enwefu iphe du ẹji, èphe meru. Obenu l'ẹnya-ngwẹja ono gbe bùhukwaruphu ẹke aanọduje eme iphe du ẹji. ¹² Mu abya edeeru èphe ẹkwo; kfuaru èphe iphemiphe ọbule, mu tųru l'ekemu. Èphe ewoleru iya-a l'ọ bù iphe shi l'ọhodo. ¹³ Èphe -gwaa iphe e gude bya iya anunu; èphe eworu anu iya taa; obenu lẹ Ojejoje; bè iphe èphe eme ta adudu mma. Nta-a; bè ọonyata iphe du ẹji, èphe eme; hùà èphe àhùhù

k'iphe dụ eji ẹphe. Mbụ l'ẹphe e-mekochaa lashia azụ lẹ Íjiputu.

¹⁴ “Ndu Ízurelu zahaawaru onye meru ẹphe; bya akpushia ụlo ndu eze. Ndu Júda egudewa ụpho-mkpuma; kpụ-pee mkpụkpụ, dụ igwe mgburumgburu. Obenu lẹ ya e-gude ọku tufu mkpụkpụ ẹphe ono; yọ dzufu iphe ono ẹphe gude metsua mkpụkpụ ẹphe; yọ bụru ọkpomgbinyiku ono.”

9

Ejo iphe ndu Ízurelu meru

¹ Unu be etekwa ẹswa; unubẹ ndu Ízurelu! T'ẹhu ba atsokwa unu ẹge ọotsotsua iphe bụ mbakeshi ọdo; kẹ l'unu meru Nchileke unu ghelegheleghele. O bụ ụgwo, a gbataru l'okpara; bẹ obu unu anoje l'iphe bụ ẹke eetsu witu.

² Ẹke eetsuje witu; mẹ ẹke aadzoshije mẹe ta anọdu ẹphe nri; mẹe ọphungu ta nụ iya ẹphe.

³ Ẹphe ta akwabukwaru l'alị Ojejoje. Mbụ lẹ ndu Ífuremu e-mekochaa laphu azụ lẹ Íjiputu; je anọdu l'alị ndu Asiriya ria nri, aasọ nsọ.

⁴ Ẹphe te egwoheduru Ojejoje ngweja-mẹe; ọphu ngweja, ẹphe egworu iya 'emehedu t'ẹhu tso iya ẹna. Ngweja ẹphe a-dụ ẹphe l'ọ bụ nri, e shiru l'ẹke madzụ nwuhuru. Iphe bụ ndu riru iya nụ a-bukotaru ndu aasọ nsọ; nri ọphu aburu nri ẹphe nkinyi ẹphe. Ẹ te wobadu iya l'eze-ulo Ojejoje.

⁵ ?Bụ ngunu; bẹ unu e-me mbọku eswe-iphe ono; mbụ mbọku ono, aa-gba aji Ojejoje ono?

6 Èphe -jekpoonu agbala t'èphe ba ala l'iyi; bẹ ndu Íjiputu a-wọ-kota èphe; ndu Mémufisu elia èphe. Èwu-ogvu efushia lẹ mkpọla-ọcha èphe, vugbaa ọnu-aswa. Amị-ogvu e-fuchishia nk'èphe.

7 Mbọku, aa-hù madzụ àhùhù ruakwaru. Mbọku, aa-kfụ onyenonu ụgwo iphe o metaru dọakwa ntse. Tẹ ndu Ízurelu makwaru l'ọ bụ ẹge ono b'ọ dụ; kẹ l'iphe dụ ẹji unu hanụkawa igweligwe. Ẹge ono; bẹ nshi-nshi, unu eme kpọwaru ẹka; mbụ l'e gbe ekuwa onye nkfuchiru Nchileke onye eswe. Onye ume Nchileke jiru ẹhu b'e gbe ekuwanu onye ọgvu byaru. ⁸ Mube onye nkfuchiru Nchileke bụ onye eche ndu Ífuremu nche; mbụ ndibe Nchileke mu. Obenu l'a gbashikotaru iya ọnya l'iphe bụ ọzo, ooshi. Èphe kpọru mu áshì kpọo kpọo jeye l'eze-ulo Nchileke. ⁹ Èphe nwumiwaru ishi enwumi l'omerushi onwèphe ẹge ono, e shi emeje l'oge kẹ Gíbiya ono. Obenu lẹ Nchileke a-ghachiru-a èphe ifu l'iphe dụ ẹji, èphe eme; hùà èphe àhùhù k'iphe dụ ẹji ono, èphe emeshi ono.

Iphe, tso ẹjo iphe ndu Ízurelu

¹⁰ Ojejeje sùru: “Lẹ teke ya chọ-vuru ndu Ízurelu b'ọ dule iya phụ l'ọ bụ onye phuru akpuru vayinu l'echi-egu. Teke ya phuru nna unu oche phẹ b'ọ dule iya phụ l'ọ bụ onye phuru akpuru mbụ l'oshi figu. Èphe ejelephu bya erua Bálu-Peyọ; woru onwèphe yeshia l'agwa Bálu; mbụ lẹ nte ono, iphere iya dụ ono. Èphe abya aburu iphe-mmanu ẹge ono iphe ono, èphe

abaru ẹja ono bu. ¹¹ Ọdu-biribiri ndu Ífuremu e-mekochaa phefu l'ọ bu nwenu. Ẹ ta abyadu bya amu iya nwa; ta pa iya ẹpho ime; te emeta iya ẹpho ọdo. ¹² Ọ -buru l'ẹphe muru unwegirima; hetsee ya; be ya e-me ẹphe; ẹphe anwushihukota l'ẹphe ha. Nsho ẹphe teke ya a-gharu ẹphe azu!"

¹³ Ndu Ífuremu; be mu phukpowaru; ẹphe du l'ọ bu ndu Táya, bu ndu a dzaru l'ẹke, dukpoo mma nshinu. Obenu le ndu Ífuremu e-mekochaa chiru unwu ẹphe nu onye mgbugbu-madzu yo gbushia. ¹⁴ Nunu ẹphe iphe; nggube Ojejoje! ? Bu ngunu; be ii-nu ẹphe? Mee t'ẹphe ba adu ike opa ẹpho-ime; ẹphe te nwe mini-ẹra, ẹphe e-che nwatibe ẹphe.

Ikpe, Ojejoje e-kpe ndu Ízurelu

¹⁵ "Ọ bu ẹjo iphe, ẹphe no le Giligalu meshia; be meru iphe ẹphe duru mu ashi l'ẹke ono. Yo buru ẹjo iphe, ẹphe emeshi; be meru iphe mu achifu ẹphe l'ulo mu. Mu te eyeheduru ẹphe obu ọdo; kele ndu ishi ẹphe l'ẹphe ha kwefukotaru ikè. ¹⁶ Ndu Ífuremu; be ome-l'ẹhu gudewaru. Akwara iya kposhihuwaru nku. Ẹ to nwedu l'o yee nebyi. Ẹphe -zushikponu unwegirima; ya echigbushia ndu ophu ẹphe yeru obu."

Hosáya; l'okfu ẹhu ndu Ízurelu

¹⁷ Nchileke mu a-jika ẹphe; ke l'ẹphe ta nuduru iya okfu. Ẹphe e-mekochaa buru ndu, agha edegiri l'iphe bu mbakeshi nonu.

10

¹ Ndu Ízurelu shi dü l'ò bú vayínu, jaru ajaja; mîshia amîmi. Oobuje teke nebyi iphe iya ono aka nshinu l'eje; yò ka òkpushi ɛnya-ngweja. Oobujekwaphu teke alì iya aka onwe iphe l'eje; yò ka omematsua mkpuma nte iya emema. ² O bú ugho; bè iphe jiru ɛphe obu. Obenu lẹ nta-a; bè ɛphe abyawa ovuta iphe dü ẹji ono, ɛphe meru ono. O bu Ojejoje e-mebyishi ɛnya-ngweja ɛphe ono; fòshia mkpuma nte ɛphe ono.

³ O bú teke ono; bè ɛphe a-wata okfu: “L'ɛphe te nwekwa onye eze. Mkpata iya aburu l'ɛphe ta atsudu Ojejoje egvu. Obenu; l'ɛphe -nwekpooru nù onye eze; ?bù ngunu b'ò ge emeru ɛphe?”

⁴ ɛphe ekweje ukwa eli-ònu. ɛphe eria nte ɛregede gude gbaa ndzu. Yò buru iya kparu iphe nseku byaru bya aka nshinu; fushilaha l'ò bú ẹjò ɛwu, fushiru l'ẹke a kòru okfu.

⁵ Ndu bu lẹ Samériya awata ọtsu egvu l'okfu nte nweswi, nọ lẹ Bétu-Avenu. Ndu nwe iya nù; mẹ ndu agwajẹ iya nù tuko l'agù aphù iya; kẹ l'òdu-biribiri iya gvùwaru; mbù l'a pawaru iya laa ọhodo. ⁶ Agwa nweswi ono; bè ee-mekochaa pata lashia Asiriya; t'ò buru iphe, e gude akwabẹ ọkaribe, bú eze ndu alì ono ugvu. Ndu Ífuremu; bè ee-me iphe-iphere. Ndu Ízurelu; bè iphere e-gude; kẹ l'ɛphe pyìshiru ntekpe dobe. ⁷ Ndu Samériya; ɛphe l'eze ɛphe; bè mini e-seta tųgbua l'ò bú otsebere-nkù, ese l'eli mini. ⁸ Iphe bú mgbogidi mgbogidi Avenu ẹke aanọduje agwa iphe; bè ee-mebyishikota. O bú iya bú ẹke ome ẹji ndu Ízurelu shi. Ogvu; mẹ

ęgbara a-bya efushia l'ęnya-ngweja ęphe. Teke ono; ęphe asu ugvu ugvu; me mgbogidi mgbogidi t'o zee zepyabe ęphe.

Ojejoje anma ndu Ízurelu ikpe

⁹ Ojejoje suru: “Unube ndu Ízurelu; keshinu oge ke ndu Gíbiya; be unu shilephu meta ęjo iphe. ?Tọ budunua ọgu gbushiru ndu ęjo iya ono le Gíbiya? ¹⁰ Ọ kwa teke du mu mma; be mu ahụ ęphe ahụhụ. Iphe bu mbakeshi a-tuko ęka nanu; tso ęphe ọgu; shi ęge ono; hua ęphe ahụu k'iphe du ęji ono, ęphe meru mmekwase ono.

¹¹ “Ndu Ífuremu du l'ọ bu nwada-eswi, a zuru azuzu; iphe aduje iya mma aburu odzoshi witu. Ọ bu iya meru iphe ya e-ye ndu Ífuremu odogoro l'olu; gude gagbabe ęphe agagbabe. Ndu Júda e-gude ęphe gbua ali ono egbugbu; ndu ke Jekọpu akpaa ya akpakpa. ¹² Unu koru onwunu odobe-ęka-ndoo l'ọ bu okfu; unu akpata n-yemobu l'ọ bu iphe ọ mitaru! Unu gbukposhia ali unu ono, e te eshidu kowa akoko ono; ke l'o ruwaru teke aa-wata okpa ishi Ojejoje; jeye yo bya wua unu odobe-ęka-ndoo l'ọ bu mini. ¹³ Obenu l'unu koru ęjo okpoma l'ọ bu onye koru okfu. Iphe unu kpataru iya aburu ęjo iphe. Unu riwaru akpuru, ęregede mishiru.

“Keshinu unu dakoberu agburu-ęhu nk'unu; dakobe ikpoto ndu soja, unu nweru; ¹⁴ be aturu ndibe unu uzu ọgu; k'ophu bu l'iphe bu ulo ono, unu kpushiru; yo butsuaru okpo-mgbinyiku ono; be a-buru iphe ee-nwukposhi enwukposhi; ęge ono, Shalumanu chikposhiru mkpukpu Betu-Abelu l'oge, a luru ọgu ono. Mbu

teke e chitaru ndu bu nne ephe l'unwu ephe
 t̄a gbaa l'ali. ¹⁵ O bu ege ono; be oo-mekochaa
 m̄aru unube ndu Bételu; ke l'ejo iphe, unu eme
 kp̄owaru eka. Ogu ono -dadelephu; be aa-cho
 eze ndu Ízurelu achochó.”

11

N-yemobu Nchileke

l'ehu ndu Ízurelu

- ¹ “Teke Ízurelu shi buru nwata;
 be ya shi yeru iya obu.
 O bu le Íjiputu;
 be ya jeru je edufuta iya;
 mbu nwa iya ke nwoke ono.*
- ² Obenu l'obujeru;
 mu eku ndu Ízurelu oku;
 ephe aka mu olufu l'ehu eje.
 Ephe adabujeru ogwa-phe Bálu;
 ege ono; be ephe
 akpo-phejeru nwantekpe insensu oku.
- ³ O kwa yebe Ojejoje ziru ndu Ifuremu ije.
 Ya shi alokpufe ephe l'eka;
 o bu l'ephe ta madu
 l'o bu iya; be meru t'ephe korohu.
- ⁴ Ya shi egudeje obu-ayò l'ehe ephe.
 Yo buru obu, ya yeru ephe;
 be ya gude edu ephe.
 Ya nyafuru ephe ajaba,
 e shi yee ephe;
 bya efuru l'ozu ephe le nri.

* 11:1 11:1 Mát 11:1.

5 “Keshinu ẹphe jìkaru l'ẹphe ta alakfutadu mu; bẹ ẹphe a-laphukwa azụ ẹ Ịjiputu; onye eze ndu Asiriya achilaha ẹphe. ⁶ Ogu-mbeke e-mekochaa jee ifu jee azụ ẹ mkpụkpu ẹphe iche l'iche; gbukashia mgbọro-ígwè, e yeshiru l'obu-edukfu mkpụkpu ẹphe; mee iphemiphe ọbule, ẹphe chíru k'ememe t'ọ bụru iyi. ⁷ Ịphe ndibe mu keberu ẹka iya bụ t'ẹphe ghaaru mu azụ. Obenu m'o -ruhuru; ẹphe kua kua onye ono, bụ Ọkaribe-Kakọta-Nụ ono; b'ẹ to kutsehekwa ẹphe ọdo.

8 “Nggube Ífuremu;

?nanụ ẹge mu e-me haa unu?

Nggube Ízurelu;

?nanụ ẹge mu e-me;

nwuru ngu nụ ndu ọdo?

?Nanụ ẹge mu e-menua

mee ngu iphe mu meru ndu Adama?

?Nanụ ẹge mu e-me

meghe ngu ẹge mu meru ndu Zeboyimu?

Obu jizitaakwaru mu;

imiko unu aduwa mu.

9 Ya ta azubekwa ngu

oke ẹhu-eghughu iya.

Ya te echikpohe Ífuremu;

kẹ l'ọ bụ Nchileke;

bẹ ya bụ; ya ta bụdu madzụ.

Ya bụ Onye dụ Nsọ, unu l'iya nọ.

Ya te egudekwa

oke ẹhu-eghughu byakfuta unu.

10 “Ẹphe e-mekochaa tsolahaa yẹbe Ojejoje. Ya e-de ekiri l'ọ bụ agụ; teke ya deru ekiri ono;

ekpeje ikpe, dụ maa tekenteke! Unu angabejeru Nchileke unu tekenteke!

Ikpe ọdo, Nchileke eku ndu Ízurelu

⁷ Ndu agba nghọ bụ iphe te edzudu edudzu; bẹ ẹphe egudeje ere madzụ iphe. Iphe aduje iya mma bụ okputa madzụ. ⁸ Ndu Ífuremu anọduje asa nsasa; sụ: “Ayi nweru iphe nshinu; ẹku byaakwaru ayi. Ẹku ono, ayi nweru ono l'ọ ha e-me; ẹ ta phụ ụrukutu, ayi arụ l'ọ bụ iphe dụ ẹji.” ⁹ Obenu l'ọ kwa mbẹdua bụ Ojejoje, bụ Nchileke unu. Ọ bụ mu bụ onye dufutaru unu l'alị Íjiputu; bụru mu e-me unu t'unu bua lẹ ụlo-ékwa ẹge unu shi ebuje teke unu shi agbajẹ eswe-iphe oge iya nọ anọno.

¹⁰ “Mu shi ekfufe anụ ndu nkfuchiru mu; shi iya mee t'ẹphe aphụ àphụ; l'anma ẹtu l'igwe.” ¹¹ ?Tị phụdu ndu Gíledu? Ẹ to nwekwa ẹphe onye abụ iphe. ?Ẹphe agwajẹ oke-eswi lẹ Gíledu tọo. Ẹnya-ngweja ẹphe e-mekochaa dakashihu; bụru ikpo mkpuma l'ẹke, a kọru okfu.

¹² Jékọpu gbalaru laa alị Áramu. Yọ bụru l'ẹke ono; bẹ Ízurelu nọ jee ozi t'ọ lua nwanyi. Yọ bụru oche aturu b'o gude kwaa ya aswa. ¹³ Ojejoje bụ onye nkfuchiru iya b'o gude dufuta ndu Ízurelu l'alị Íjiputu. Yọ bụkwaruphu onye nkfuchiru iya b'o gude leta iya ẹnya. ¹⁴ Obenu lẹ ndu Ífuremu mewaru iphe eghulaha Ojejoje kẹ damụdamu. Nnajiufu iya e-me t'ikpe ọchi onye o gburu kwa ya l'ẹhu; ẹge ono; bẹ ọo-kfukwa iya phụ ụgwo iphe-iphere, o meru iya.

13

Ikpe ikperazu, eeku ndu Ízurelu

¹ O shi abujeru; Ífuremu -kfua okfu; madzụ anmahu kpakpakpa. Ífuremu shi bụru onye, a kwabẹ ugvu nshinu l'alì Ízurelu. A nọnyalephu; yọ wata ọbaru Bálu ẹja; ikpe anma iya; yọ nwụhu. ² Nta-a; bẹ ndu Ífuremu kabaaru ome ẹjo iphe. Ẹphe kpụshiru ntẹkpe dobegbaaru onwẹphe; mbụ ntẹkpe, e furu ẹka l'ẹnya gude mkpọla-ọcha meshia. Ọ bụ ndu maru ome nka gude ẹka kpụshia ya. Iphe ndiphe ekfu bụ: “Lẹ ndu-a egudejekwa madzụ gwoo ẹja. Madzụ -gbeshi; yo je etsua agwa nweswi ono ọnu.”

³ Ọo ya meru iphe ẹphe a-dụ l'ọ bụ iji, ada l'utsu; mbụ iji, ada lẹ nchi-abọhu, abuje: ọ -datsua; yo phukashihu. Ẹphe a-dụ l'ọ bụ ẹswa, e-phekashihu nụ l'ẹke eetsu witu; mbụ l'ọ bụ ẹnwuru-ọku, shi lẹ windo ekposhihu.

⁴ “Obenu l'ọo mbẹdua bụ Ojejoje; bụru Nchileke unu. Ọ bụ mu bụ onye dufutaru unu l'alì Íjiputu. T'e b'ọ dukwa iphe ọdo, unu e-je amaru ọdo; gbahaa mbẹdua, bụ Nchileke; kẹ l'ẹ tọ dukwa onye ndzọta ọdo, nọnu; gbahaa mbẹdua. ⁵ Ọ bụ yẹbedua letaru unu ẹnya teke unu nọ l'echi-ẹgu; mbụ l'alì ọkponku ono, enwu phuraphura ono. ⁶ Teke mu nuru ẹphe nri; bẹ mu nujiru ẹphe ẹpho. Ya ndono; ẹpho ejilephu ẹphe; ẹphe awata ọnyi ndụ; woru mu zahaa. ⁷ Ọo ya bụ; lẹ mu a-kwaru ẹphe l'uzo l'ọ bụ oduma; fọaru ẹphe l'ọ bụ agu. ⁸ Mu a-furu ẹphe; zijaa ẹphe ezija l'ọ bụ biye b'a nataru unwu

iya. Mu a-zu ẹphe l'ọ bu agu; anegu-egbudu alajashia ẹphe alajashi.

⁹ “Unube ndu Ízurelu; mu e-mekwa unu t'unu laa l'iyi; ke l'unu gbe etso mu okfu. Yọ buru onye ophu eyeru unu ẹka; be unu gbe etso okfu. ¹⁰ ? Nanu eze unu nta-a t'ọ bya adzo unu? ?Nanu ndu achitsua mkpukpu unu; mbu ndu ono, unu suru mu: ‘Te mu nu unu onye eze; me ndu ishi, anodu achi unu.’ ¹¹ To du iya bu; mu abya egude iphe eghughu fotaru unu eze; mu abya egude ẹhu-eghughu nafu iya unu.

¹² “Ejo iphe ndu Ifuremu mekotaru b'e dokoberu ẹphe edokobe. Iphe ẹphe mesweshikotaru b'e deshikwaru dobe. ¹³ Ipe-ẹhuka, ooje dule iya phu l'ọ bu nwanyi, ime eme. Obenu l'ọ du l'ọ bu nwata, ta madu iphe abujeru: Oge ezeda -rua; to madu t'o ye ishi l'enu ẹhu nne iya. ¹⁴ ?Bu te ya kfu ugwo gude gbata ẹphe te ali-maa ba aka ẹphe ike to. ?Ya e-ye iphe l'itumo gude gbata ẹphe l'eka anwuhu. Nggube anwuhu; ?bu awe; be iphe ono, i gude egbu madzu ono no? Nggube ali-maa; ?nanu iphe ono, iigudeje emebyishi madzu ono? Ya ta byakwa bya aphuru ngu imiko. ¹⁵ E to nwekwa me Ifuremu byaru bya azua karia unwunna iya ndu ophu; be oke pherephere, shi l'eka Ojejoje e-shilekwaa l'uzo enyanwu-ahata byakfuta ẹphe. Oo-shi l'uzo echi-egu bya amichakota mini ndu Ifuremu. Ishi nggele ẹphe atabuhu. Welu ẹphe akposhihu nku. A tuko iphe bu ẹku, o shi kpata akpata ruta. ¹⁶ Ndu Sameriya e-vuru iphe du eji, ẹphe metaru; ke l'ẹphe kwefuru Nchileke

ẹphe íkè. Ọ ọgu-mbeke; ẹ ẹe-gude gbushikota ẹphe. Ẹnwegirima ẹphe ndu ọphu angu ẹra; ẹ ẹe-tufashi etufashi; dzufushia ẹnwanyi ẹphe ndu ọphu du ime ẹpho.”

14

Hosíya arọ ndu Ízurelu

¹ Unube ndu Ízurelu; unu lakfuta Ojejoje, bu Nchileke unu! Ọ kwa iphe du ẹji, unu eme meru iphe unu daru! ² Unu gude okfu-ọnu unu gude lakfuta Ojejoje. Unu bya asu iya: “T’o guaru ayi nvu l’ẹjo iphe, ayi l’o ha. T’o gudenu ke l’o bu onye emeje eze-iphe-oma nata ayi; ẹge ayi e-gudekwanu okfu-ọnu ayi gwaa ya! ³ Ndu Asiriya ta adzo-ghekwa ayi. Ayi te ekeheru ikè egheru inya-ogu odo. Ayi te egudehe ọnu ayi su agwa l’o ya bu Nchileke ayi; mbu agwa, bu ayibedua gude ẹka ayi mee ya. Ọ bu nggu Nnajiufu bu onye aphujeru onye a toru nwogbee imiko.”

Ụkwa ndzu ọphungu l’ẹhu Ízurelu

⁴ Ojejoje sọru:

“Ya e-me; ẹphe abu-buhu ndu agharaba.

Ya abya atushihu okpoma; yeru ẹphe obu; ke l’ẹphe ta aduhedu mu ashị.

⁵ Ya a-duru ndu Ízurelu;

l’o bu iyi l’adaru ẹphe.

Yọ ja pulapula l’o bu okfukfulike.

Ọgbaragba iya abamia

abami l’ime alị l’o bu

oshi sida Lébanonu.

⁶ Ẹnwu iya ndu ọphu du

nongini-nongini a-jakashì;
malahaa mma l'ò bú oshi olivu.
Mkpò iya a-dù l'ò bú
mkpò oshi sida Lébanonu.

⁷ Madzù a-bya bya
adólahaaru lẹ mkpuli iya ọdo.
Ọo-nọdu aja pulapula l'ò bú akpe;
mbù ọo-kfù kpuru
yẹgelengu l'ò bú vayinu.
Ụdu iya atuko ẹkemeke
ngaa l'ò bú mkpò mẹe,
shi Lébanonu.

⁸ ?Bù ngunu ọdo;
bẹ ndu Ífuremu; ẹphe lẹ nte ji;
l'ẹke ọ kwa yẹbe Ojejoje
azajẹ ẹphe oku; l'eleta ẹphe ẹnya.
Ọ kwa yẹbedua bú
oshi payinu ono,
ẹkwò iya jiru ejiji ono.
L'unu amĩa nebyi;
kwa yẹbedua b'ò shi l'ẹka."

Mkpò-chi ishi iya

⁹ ?Bù onye bú onye, maru iphe? T'ò mụtakwa iphe l'iphe-a! ?Bù onye bú onye iphe edoje ẹnya ọhuma? T'ò dokotakwa iya ẹnya! L'uzo kẹ Ojejoje dukotakwa nhamunha. Yọ buru ndu doberu ẹka ndoo eshi iya. Obenu lẹ ndu kwefuru ikè; bẹ ụkfu aduje; m'ẹphe je iya eshishi.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb